



人生的路家己行

看著阮後生選好的頭路毋做，煞欲走去臺北彼个大都市賣啥物進口的『bih-luh』，頭起先我是真無贊成。伊有共我尊存，一直共我講，目前這個頭路雖然離咱兜較近，閣定定接觸外國人，毋過伊對重機械無興趣，伊的同學欲介紹伊去臺北賣進口的麥仔酒，伊想欲去試看覓咧！

我共伊講，咁燒酒毋好，咱兜攏無人咁燒酒，而且對佛家來講，咁酒是破五戒，咁酒會誤大事、出車禍。咱隔壁彼个酒恁的，咁酒咁甲田園賣了了，個某嘛綴人走。咱家己都無愛咁矣，哪通去賣酒來害別人咧？這是我聽著伊欲去賣燒酒足受氣共伊講的話。毋過反對無效，畢竟囡仔已經大漢矣，人講「會生得囡身，袂生得囡心」，逐擺伊決定的代誌，攏是真堅持欲去做。

雖然阮是庄跤人，毋過所有看過伊的人攏講伊已經成做是都市人，因為伊的穿插恰生活方式，恰阮差足濟，干焦看衫仔櫥恰彼二、三十雙鞋仔，個老爸逐擺看看咧攏是幌頭。

姑不而將，最後我嘛是恬恬仔祝福伊。我看伊為著欲去彼間公司上班，開始去上課，認真咧讀相關的英文冊，敢若有咧學習喔！兩個月後才正式予人錄取，這馬便若看著伊轉來，我就緊共伊問：「做了按怎？」連繼兩擺伊攏共我講：「誠好。」

我心內猶是誠懷疑，毋過我有共交代，出門在外愛注意，歹代毋通做、毒品毋通沐、跋筴毋通學、咁燒酒毋通過量，上重要的，咁酒袂使閣駛車。我想伊已經大漢矣，真濟代誌家己愛知分寸。

天下爸母心，我無向望囡仔做偌大的事業、有偌大的成就，干焦愛伊平平安安，腳踏實地，規規矩矩來做人，會曉安排家己的人生就好。畢竟伊的時代恰我少年時陣的環境已經無全，伊這馬的壓力一定比我以前閣較大，我希望伊會當加學一寡物件來增加家己的能力。

全款彼句話，「兒孫自有兒孫福」，我干焦會當佇後壁恬恬共祝福，向望伊會當事事項項攏順序，這就是我上大的安慰。

作者：蔡素珠

☆詞彙學習☆

【尊存】tsun-tshûn：禮讓、顧及。基於對長輩或重要人士的敬重，在一些事情上禮讓或顧及先知會對方，為其保留地位及尊嚴。

【成做】tsiânn-tsò/tsiânn-tsuè：變成、成為。

【穿插】tshīng-tshah：穿著、打扮。

【幌頭】hàinn-thâu：搖頭。

【姑不而將】koo-put-jî-tsióng/
koo-put-lî-tsióng：不得已、無可奈何。

【連繼】liân-suà：連續、接連不斷。

【沐】bak：沾惹、接觸某件事或某個人。

【跋筴】puáh-kiáu：賭博。